

Pemuda mengaku tumbuk tiga lelaki dipenjara 10 bulan

KUCHING: Mahkamah Majistret semalam menjatuhkan hukuman penjara 10 bulan terhadap seorang pemuda yang mengaku bersalah menumbuk muka dan badan tiga lelaki dalam satu kejadian di Jalan Northbank di sini, tahun lalu.

Muhammad Irfan Tom Frankie, 21, didakwa atastiga pertuduhan, masing-masing dibuat mengikut Seksyen 323 Kanun Keseksaan yang memperuntukkan hukuman penjara sehingga setahun atau denda sehingga RM2,000 atau kedua-duanya sekali.

Majistret Ling Hui Chuan memerintahkan tertuduh dijatuhi hukuman penjara empat bulan bagi pertuduhan pertama, sementara bagi pertuduhan kedua dan ketiga, masing-masing penjara tiga bulan.

Ling juga mengarahkan hukuman penjara dijalankan secara berturutan berkuat kuasa semalam, menjadikan

kesemuanya 10 bulan.

Mengikut kesemua pertuduhan, tertuduh didakwa dengan sengaja mencederakan ketiga-tiga mangsa berusia antara 17 hingga 22 tahun dengan cara menumbuk kepala dan badan mangsa.

Kesalahan itu didakwa dilakukannya pada 10 Oktober 2025, sekitar jam 5.20 pagi di tempat letak kereta berhampiran sebuah klinik di jalan Northbank di sini.

Berdasarkan keterangan kes, salah seorang mangsa (pengadu) sedang duduk bersama 10 rakannya di tempat letak kereta tersebut sebelum didatangi beberapa lelaki tidak dikenali yang menaiki tiga kenderaan.

Kesemua lelaki tersebut kemudian bertindak memukul pengadu dan rakan-rakannya dengan menggunakan kayu besbol dan sebagainya, sebelum beredar dari lokasi.

Akibat serangan tersebut, pengadu mengalami luka dan

bengkak pada mata kanan, bengkak serta lebam di dahi kiri, lebam pada kedua-dua tangan, selain sakit di bahagian belakang badan dan kaki kanan.

Kawan-kawan pengadu yang juga mangsa dalam kes ini turut mengalami kecederaan sementara individu di tempat kejadian lain sempat melarikan diri.

Pengadu yang tidak mengetahui punca kesemua lelaki terbabit berbuat demikian seterusnya membuat laporan polis untuk tindakan selanjutnya.

Hasil siasatan polis kemudian membawa kepada penangkapan tertuduh pada 30 Oktober 2025 dan meneruskannya, polis mendapati tertuduh telah mencederakan mangsa-mangsa di lokasi kejadian.

Pendakwaan dilakukan oleh Timbalan Pendakwa Raya Ahmad Fauzulutfi Suri ani sementara tertuduh tidak diwakili peguam.